



kintza eman behar du, kultura hedatu, izpiritua aberastu behar du. Beste batzurentzat, hori dena ondo dago, baina ofizio bat egiteko ere prestatu egin behar du. Baina nola lanbide bat eskaini lezake selekzioerik eta lanarekiko estudioen egokitzerik ez baldin bada? Ezaguna da letrazko karrera egin duten askok eta askok ez dutela dagokiekeen lanbiderik bilatzerik. Zer egin, ba? Gobernuak nahi duen bezala, ikasketak beharkizun ekonomikoetara moldatu? Baina ez ote da hori Unibertsitatea enpresen morroi bilakatzea, kapitalaren zerbitzari bihurtzea?

Ba dirudi Unibertsitatearen egitura bera dela gaur egun krisian dagoena. Zein eginkizun eman behar zaio gizarte? Hona eztabaida nagusia. Gizarte kapitalistaren morrontza-leku ez baina askatasun-gune izan dadin nahi badugu, "etengabeko formazioari" as-

koz ere garrantzi handiagoa eman beharko diogu, hain zuzen eskulanaren eta burulanaren arteko egokitze hori aberasgarri izan ahal dadin.

Unibertsitatearen lekuaren hauzia betidanikoa izanik ere, Frantziako egoeran are nabarmenago dago, inguruagatik. Esan nahi baita, ekonomiazko krisi honekin diru-arazoa eta lan-bilaketaren zailtasunak handiagotu egin direla. Eta gero, 1950ean 16 unibertsitate-hiri eta 200.000 estudiante baldin baziren, gaur egun 32tik gora dira unibertsitate-hiriak eta unibertsitariak 800.000. Gizarte-zati garrantzitsua da, bai kantitatez eta bai kalitatez.

Joan Mari Torrealdai

# HIRUGARREN MUNDUA



## mauritania

Herri tiki baten drama.

Ixilaren harlosa erori da Sahararen gainera. Askatasuna lortu baino lehen galdu egin zuen Herri horretan ez dakigu zer jazotzen den.. Noizbehinka POLISARIO burrukalariaren danbatakoren baten berri jakiten dugu, baina berriz ere ixila.

Marokko-rentzat irabazbide, Sahara-rentzat zapalibide eta Espainiarentzat ihesbide gertatu den Madrileko akordio hura, Mauritaniarentzat drama ger-

tatu da. Izan ere, Herri tiki baten dramarik handiena hauxe da: bere askatasuna lortu eta finkatu aurretik, beste Herri tikiren baten zapaltzaile gertatu beharra.

Herri handia da Mauritania lurraldez (1.800.000 km<sup>2</sup>), baina tikia bizilagunez (1.400.000) eta tikiagoa ekonomi eta politik indarrez. Orain dela hamabost urte lortu zuen Mauritaniak bere politik askatasuna Frantziagandik. Eta basamortuan sorturiko Herri hau ahalegindu da urte hauetan bere pobretasunetik irteten eta bere politik bidea urratzen, baina oraindik ere bere arazo nagusienak hortxe ditu bizi eta idazten dakitenak. Orain dela hamabost urte bost unibertsital ikasle bakarrik zituen Mauritaniak; gaur egun ez dira bi milatara iristen.

Mauritaniak kidetasun handia du Sahararekin, bai geografi aldetik, bai arraza aldetik eta bai kultura aldetik o/o 75 arabiarrak dira; besteak beltzak. Aurrenek artzantzan dute gehienbat bere bizibidea; beltzek, berriz, hegoaldean bizi dira, eta nekazaritzatik jaten dute.

Mauritaniaren aberastasunik handiena burdin eta kobre hobiak dira.

Orain dela urtebete nazionaldu egin zituen gobernuak, eta ordutik horien emana handitu egin da: horrela Afrika osoan hamargarren lurraldea da Mauritania burdina gehien produzitzen dutenen artean.

Mauritaniak anaia du alde askotatik Sahara Herria, eta POLISARIOko lagun batek esan zuenez, Mauritaniako Herriak funtsean nahi duena Sahararen askatasuna da, bere eta Marokko-ren artean beste Herri bat egon zedin ere bai; baina Marokkiar Gobernuak Saharan dituen bere asmo eta interesetan Mauritania ere nahastea lortu du.

Paulo Agirrebaltzategi